

Te Morto Separá Nos Fo'i Otro

Yanüari. Luna pa purba rekuperá despues di e gastunan di fin di año. Luna di un rito anual tras di porta será konosí komo “inventario.” Luna ku Ofisina di Poblashon i Registro Sivil ta publiká sífranan pa e año ku a pasa, entre otro, sífranan ku ta representá tragedia personal, publiká bou di kategoria “divorsio.”

Divorsio por parse atraktivo...alivio for di un persona ku ta hasi bo bida miserabel. Ma di bèrdat, divorsio ta un tragedia. E ta trágiko p'e pareha mes ku un tempu a stima otro asina tantu ku nan a primintí di keda fiel na otro te morto separá nan. Ma e matrimonio a bira guera familiar i a kulminá ku divorsio, laganda heridanan emoshonal, kurasonnan kibrá i lágrimanan.

Lo tabata mas fásil pa soportá morto di e kasá ku pa bisa mama òf tata di bo yunan “tur kos a kaba.” Sabiendo ku nunca mas boso lo forma un famia ta un peso sofokate. Awor bo ta yega na un kas bashí despues di trabou, ningun yu pa topá bo na porta. Radio òf televishon ta bo kompañé konstante pa silensia e soledat gritando den bo alma kibrá. Otronan ta purba hoga nan tristesa ku un bòter mas di serbes.

Ademas **salú di e èks-pareha ta afektá.** Hende ku ta divorsia tin mas chens di muri di atake selebral, atake di kurason, kanser, i tenshon ekstremo.

Tin sierto kantika muchu penoso pa skucha pasobra e ta hasi bo kòrda bo èks-kasá; tin sierto lugá ku bo memoria lo tormentá bo pa bishitá; sierto fecha ku ta pone bo wowo yena ku awa.

Pa bolbe kasa tampoko t'e solushon. Segun estadística, ménos ku 30% di segundo matrimonionan ta dura sinku año. I bibamentu ta un alternativa pió.

Divorsio ta trágiko p'e pareha. **Ma e ta katastrófico p'e yunan.** Estudionan ta indiká ku en general divorsio ta nifika un stèndert ekonómiko muchu mas abou pa e èks-esposa i yunan. E chens ku nan lo keda sinta, wòrdu ekspulsá di skol òf keda sin haña diploma ta subi. Nan tin mas tendencia di ta deprimí, usa droga òf alkohòl, kometé krimen, sali na estado sin ta kasá, i tin mas problema pa forma amistadnan duradéro. E yunan hòmber por bira mas agresivo i komportá nan na maneranan inaseptabel. Yunan muhé lo ta mas ansioso, tin sintimentu di culpabilidad, i tin mas chens di divorsia ora e kasa. Sabiendo esei, kon bo por wak bo yunan inosente den kara i splika nan ku djis pasobra mami i papi no por yega na akuerdo, bo ta bai spat nan famia for di otro pa semper i kruelmente desfigurá nan futuro tan antispá?

E víkteman an adolésente inosente di divorsio no ta inkluí den konteo di Ofisina di Poblashon i Registro Sivil. Tampoko mayornan di e pareha. Suegro i suegra ta sufri hopi sintando den tribuna mirando dos hende stimá den “reng” kaba ku otro.

I e tragedia no ta limitá na e famia. Nos komunidad tambe ta sufri kada biaha ku e promesa “te morto separá nos fo'i otro” ta violá. Ku oumento di divorsio, ehèmpelnan positivo pa nos yunan ta bira mas skars. Kada biaha ku un pareha ta divorsia, e ta manda un otro klabu den kaha di morto di e matrimonionan di e siguiente generashon. Divorsio ta un tragedia pa tur hende.

Beibel ta enfatisá ku *“Un hòmber lo bandoná su tata i mama i lo uni e su esposa; i nan dos lo bira ún karni. Asina anto nan no ta dos mas, sino ún karni. Pesei loke Dios a uni, no laga ningun hende separá”* (Mateo 19:5-6). Dios tin palabra fuerte pa ku divorsio: *“Mi ta odia diborsio”* (Malakias 2:16). Esun ku no ta bandoná tur otro i hasi máksimo esfuerso pa mantené su matrimonio intakto ta buska problema ku Dios.

Si bo ta kontemplá forma parti di e sífranan di divorsio di Ofisina di Poblashon i Registro Sivil yanüari otro año, pensá bo atrobe. **E preis ta karísimo!** Apesar di bo problemanan ku bo kasá, buska yudansa, sigui lucha pa bienestar di bo matrimonio te morto separá boso fo'i otro.